

**Sinerissap qanittuani aalisariutit isaterneqarneranni
akileraaruteqaataajunnaarnissaannik Naalakkersuisut peqquneqarnissaannik
Inatsisartut aalajangiiffigisassaattut siunnersuut**
(Inatsisartunut ilaasortaq Jens Napätök, Partii Naleraq)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinnineq

Aalajangiiffigisassatut siunnersuut una 2019-imi Inatsisartut upernaakkut ataatsimiinneranni siullermeerneqarpoq. Siunnersuutip itigartitsissutigineqarnissaa Naalakkersuisunit inassutigineqarpoq, siunnersuummi iluserisamisut iluseqartillugu akuersissutigineqassappat piginnikkunnaarnermi pissarsiat assigiinngitsumik akileraartarnikkut iliuuseqarfigineqartalerneranik kinguneqassamat, taamaalillunilu assersuutigalugu kinguaariit nikinneranni angallat tuninagu isaterinermik tapiissummik pissarsinerup pilerinarnerulerneratigut aningaasaqarnikkut pissutsinik naapertuutinningsorujussuarnik pilersitsissamat. Taamatut assigiinngissitsineq tunngavissaalatsineqarpoq peqatigisaanillu akileraartarnermik aaqqissuussinermi ataqatigiinngitsumik inatsisitigut toqqammavissiillunilu pisariunerulersitsisussaavoq.

Tamanna tunuliaqutaralugu siunnersuut ilaatigut apeqqutit arlallit siullermeerinninnermi qaqilerneqartut akissuteqarfigineqarnissaat, ilaatigullu siunnersuummut aningaasalersuutaasinnaasunik innersuussinissaq siunertaralugu Aningaasaqarnermut Akileraartarnermullu Ataatsimiititaliamut suliarineqartussatut innersuunneqarpoq.

Ataatsimiititaliarlu maanna isumaliutissiissummik saqqummiussivoq, tassanilu ataatsimiititaliami amerlanerussuteqartut siunnersuutip akuerineqarnissaa inassutigaat. Ataatsimiititaliami amerlanerussuteqartut siunnersuutip qanoq aningaasalersorneqarnissaannik siunnersuuteqanngillat. Ataatsimiititaliami amerlanerussuteqartut siullermeerinninnermi apeqqutit qaqqineqartut soorlu apeqquteqaateqarnikkut isumasioqatigiinnikkulluunniit akissutissarsiornagit, siunnersuutip akuerineqarnissaannik inassuteqarnerat Naalakkersuisut tupigusuutigaat. Taamaalilluni isumaliutissiissut siunnersuutip inaarutaasumik akuersissutigineqarnissaanut itigartitsissutigineqarnissaanulluunniit Inatsisartut aalajangernissaannut patajaallisaanissamat taamaallaat killilimmik naammassinnippoq.

Naalakkersuisut 2019-imi upernaakkut Aalisarnej pillugu Ataatsimiititaliarsuarmik pilersitsippot. Ataatsimiititaliarsuup ilaatigut aalisariutit nalimmassarnissaat kinguaariillu nikinnerini siuarsarnissanut periarfissat isumaliutigisussaavai. Tamanna pillugu Ataatsimiititaliarsuarmut suliakkiummi ilaatigut ima allassimasoqarpoq:

*"Aalisarnermik inuussutissarsiuteqartut angallatinik naleqqussaassagunik
sapinngisamik namminneq aningaasalersussavaat. Ataatsimiititaliarsuaq
taamaammatt inuussutissarsiortut aningaasaliinernut taakkununnga
pisariaqartunik aningaasaliisuusarsinnaalernissaannut tassungalu
peqatigitillugu aningaasatigut taparserneqaratik angallatinik*

naleqqussaasinnaangortillugit kinguaariillu nikissinnaasunngortillugit aalisarnermik aqutsinerup aqqissuunniarneqarnissaanut siunnersuusiussaaq."

Siunnersuutit ataasiakkaat unatut ittut, aalisarnermik inuussutissarsiornermi toqqaannangitsumik tapiissutit annertusarnerannik siunertaqartut, minnerunngitsumillu Ataatsimiititaliarsuup, partiit 2018-imi Naalakkersuisunngortitsisut naalakkersuisooqatigiinnissamik isumaqatigiissutaat tunuliaqutaralugu amerlanerussuteqarluartunik taparserneqarluni pilersinneqartup sulinerata siunertaanut akerliutillugu.

Tamanna tunuliaqutaralugu Naalakkersuisut allannguutissatut siunnersuut una inassutigaat:

Aalisarneq pillugu Ataatsimiititaliarsuup isaterinermut tapiissutit maleruagassaannik naleqqussaannermik, akileraartarnikkullu taassuma suliarineqarnerani apeqqutinik ataatsimiititaliarsuup isumaliutissiissutissaanut ilanngussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Allannguutissatut siunnersuut taanna taparserneqassappat, Aningaasaqarnermut Akileraartarnermullu Ataatsimiititaliap immikkut saqqummiussai, inunnut aalisarnermik ingerlatsisinnaajunnaartunut tamatumalu nassatarisaanik taamaallaat killilimmik aningaasaateqartunut sammititamik suliniuteqarsinnaanermik pisariaqartitsineq Naalakkersuisut ataatsimiititaliarsuarmut erseqqissaatigiumavaat.

Allannguutissatut siunnersuut taparserneqarsinnaangippat, siunnersuutip Aningaasaqarnermut Akileraartarnermullu Ataatsimiititaliamut utertinneqarluni, ataatsimiititaliap Aalisarneq pillugu Ataatsimiititaliarsuup isumaliutissiissutaanik aalajangiiffigisassatut siunnersuut una pillugu ilassutitut isumaliutissiissumminut ilanngussissasoq, Naalakkersuisut **inassutigaat**. Tamannalu isumaqarpoq aalajangiiffigisassatut siunnersuutip aappassaaneerpeqarnissaa kinguartinneqassasoq, Aalisarneq pillugu Ataatsimiititaliarsuup isumaliutissiissumminik saqqummiinerata kingorna Inatsisartut ataatsimiinnissaannut siullermut.